

Jasmin Džindo

(27. august 1965 – 30. august 2015)

Nažalost, živimo u vremenu kada se u zasjenak stavljaju sve norme časnog i poštenog života, a moralni i vrijednosni sustavi ruiniraju do te mjere da se stvara klima u kojoj niko nikome ne vjeruje ili u kojoj su ljudi spremni prodati sve (sopstveni ugled i zemlju) za malu korist. Podneblje u kojem obećanje ili zakletva ne vrijede ni najmanjeg novčića. Ali, i u takvim prilikama može se naići na čovjeka koji se bori da ne završi na „tamnoj strani sile“ a ujedno i bude na usluzi i koristi što je moguće većem broju ljudi. Tako sam i ja imao tu sreću da upoznam prof. dr. sc. Jasmina Džindu i budem njegov saradnik i prijatelj.

Jasmin Džindo posjedovao je niz kvaliteta: otvorenost za nove ideje i mogućnosti, sklonost ka forsiranju mlađih kadrova, odsustvo bilo kakve arogancije u odnosu prema suradnicima i kolegama te uvijek prisutna spremnost da se sasluša sugovornik. Kolegi Džindi uvijek je bio bliži dogovor nego konflikt. Diskurs polemiziranja koji je svrha sam sebi ili zadovoljavanju nečijih sujeta (nažalost toliko prisutan u našoj akademskoj javnosti) bio mu je potpuno stran. Ove osobine doprinijele su da kolega Džindo postigne značajne rezultate i u sopstvenom akademskom radu i uzdizanju, kao i u radu i djelovanju na polju italijanistike (svojoj matičnoj znanstvenoj oblasti) te radu i djelovanju za interese i progres Filozofskog fakulteta kao cjeline.

U akademskom pogledu profesor Džindo u svojoj karijeri ostvario je velika postignuća. Pored činjenice da je zvanje doktora nauka stekao na prestižnom Filološkom fakultetu Univerziteta u Paviji, kolega Džindo objavio je pet knjiga i brojne članke i studije, a preveo je i dvije knjige sa italijanskog jezika na bosanski, kao i velik broj članaka sa italijanskog i francuskog jezika. Profesor Jasmin Džindo ostavio je iza sebe razvijenu novu katedru italijanistike sa plejadom mladih nastavnika i znanstvenika koji su ga naslijedili. Imao je dovoljno i vizije i snage i poduzetništva da kao prodekan za međunarodnu suradnju i naučno-istraživački rad vodi složeni projekt razvitka izdavačke djelatnosti, posebno u vidu elektronskog izdavaštva koje je u tim godinama imalo pionirski karakter. O uspješnosti toga projekta dovoljno govore činjenice po kojima je Filozofski fakultet u Sarajevu danas jedan od najuspješnijih izdavača u BiH sa velikim brojem objavljenih recenziranih knjiga i monografija i redovitim izlaženjem Radova Filozofskog fakulteta. Ali da bi se taj projekt ostvario, trebalo je preći dug i trnovit put, praćen nerazumijevanjem i neshvatanjem. Trebalo je pobijediti i apatiju i letargiju, kao i ustaljene načine razmišljanja. Profesor Džindo uspijevao je, kao šef Redakcije koja se prihvatila ovoga projekta, „na prvoj liniji“ braniti interese projekta te ih i dalje reprezentirati, promovirati i razvijati. Svojim pristupom ulijevao je članovima Redakcije dodatnu snagu i energiju onda kada se činilo da zaostajemo ili da smo previše sputani. Uspijevao je na pravilan način artikulirati i usmjeravati velik broj prijedloga, ideja, mišljenja. I na kraju, rezultat jednog velikog rada počeo se ukazivati u proljeće 2011. godine kada su objavljene naše prve elektronske knjige, a zatim i printane, kao i ustaljivanje izdavanja naše serijske publikacije Radovi.

Može se slobodno reći da bi znanstveni i izdavački rad na Filozofskom fakultetu u Sarajevu bio značajno siromašniji da nije bilo rukovođenja profesora Jasmina Džinde na bitnim i vizionarskim projektima.